

黎氏家集

三



從兄伯庸黎府君行狀

兄諱兆勳字伯庸號樹軒一號檬村晚又稱礪門居士
遵義黎氏祖諱安理以舉人官山東長山縣知縣考諱
恂字雪樓以進士官雲南巧家廳同知妣周宜人兄為
雪樓府君冢子生有殊稟九歲即能口占五七字詩戲
贈同輩稍長先後隨宦山東浙江倜儻有大志不屑為
鄉曲諛儒人或目為狂雪樓府君之自桐鄉歸也以詩
古文倡誘後進於科舉之學未甚屬意故兄年逾弱冠
猶未令習制舉業二十三出應童子試不售歸乃取坊
塾時藝揣摩之以為不足學棄去比逾歲再試遂以古

學第一補諸生學使錢唐許尚書乃普負知人鑒得兄
卷驚異之未深信於覆試日面以溫飛卿詩句命題令
獨賦兄頃刻成五言八韻四首尚書披吟移晷謂曰子
他日必以詩鳴第品骨近寒恐祿位不及才名耳自是
益肆力於古與外兄鄭子尹珍共硯席者七八年兄天
性高曠其讀書串穴古今尤縱其才力為詩詩所不能
盡溢而填詞詩不專主一格詞則服膺辛劉周秦為多
歲己亥山陰平樾峰太守翰來守吾郡聘子尹及獨山
莫子偲孝廉同修郡志平公故愛才下士篤嗜風雅偶
聞兩君道兄才即以所作感懷八律郵筒索和兄一夕

次韻寄答平公得詩詫為奇偉即延至署訂交兄以一
諸生布衣芒屨往來二千石之庭升堂抗禮忘其勢分
之相懸也然文章詩酒外絕不及公私一語平公尤重
之會雪樓府君令滇南兄策馬趨庭比至登五華泛昆
明盡攬金馬碧雞之勝獻弔莊躋南詔益以助其詩境
於功名未嘗汲汲也年逾強仕雪樓府君乃援永昌軍
例為報捐教職兄聞之歎曰吾黎氏世以科第起家此
事可自我作俑乎既而曰青氈亦吾家故物也使得藉
此讀書餘薄祿了吾親三徑資亦未為不義己酉秋權
石阡教授石阡舊稱僻壤兄至被以絃歌澤以文藻士

習為之一變又二年補開泰訓導課士一如石阡暇復
重編董忠烈公三謨蓮花山墓紀畧又蒐輯明末貞臣
逸士零章斷句為黎平詩系又欲輯本朝貴州人詩拳
拳於鄉先掌故未幾古州苗變洊擾黎平兄奉檄防堵
出入蠻鄉瘴嶺間瀕危者屢矣事後嘗曰吾於蠻村夜
宿時每柝聲四寂星斗芒寒靜驗身心反諸平旦乃知
龍場謫戍得悟良知亦緣處境始然也兄至是殆欲刊
落詞華一歸於性命之旨矣後以防苗功擢湖北鶴峰
州州判兄念兩親年高不欲遠離而雪樓府君歸老林
下杖履方健促令出山丙辰秋赴鄂至則益陽胡文忠

公方開府是邦以兄才士又黎平故吏也留居省垣攝
藩照磨人咸謂守令可旦夕致而兄不肯趨伺長官故
每值遷調忌者多以簡傲見阻癸亥調補隨州州判兄
性豪爽重交游顧取友必慎於黔惟唐鄂生觀察胡子
何趙曉峰學博趙兩三同守及子尹子偲兩孝廉最稱
友善至楚則監利王子壽比部龔子貞學博陽湖徐子
楞布衣江甯汪梅岑孝廉中江李眉生觀察數君子而
己所至無標榜聲聞居灑潔一室環列圖史淪茗賦詩
其中歌嘯自如明年遭雪樓府君憂奔喪旋里兄痛一
官羈滯未得躬親斂窆哀毀之餘偶染時疾十日竟卒

同治甲子八月二十日也享年六十有一配阮孺人妾
陳氏梁氏無子以叔弟兆祺子汝弼為嗣孫一棟著有
侍雪堂詩集八卷葑煙亭詞四卷兄生平篤於友愛余
家期功兄弟九人多從兄授讀庶燾服兄教二十年深
愧學行無似惟略陳梗概冀當代立言君子錫以傳誌
而傳之不朽云從弟庶燾謹狀

從兄伯庸先生墓表

同治二年癸亥八月二十九日我世父雪樓公告終明年春兄自隨州州判任內奔喪旋里年六十矣先以水陸撼頓失飲食節至又哭泣摧哀傷彌甚既葬疾作八月二十日亦卒春秋六十加一十一月初三日祔葬車田芝山世父墓右兄諱兆勳字伯庸晚號礪門居士九歲即能為五七言詩持贈同輩長老驚歎既冠俊邁有奇氣不肯役志帖括世父亦雅不欲強之兄進則奉槃御食左右就養退則與外兄鄭子尹珍同事研席銳志求通於古而趣嚮各殊子尹稽經誦史志為通儒兄則

竭力於詩上起風騷訖於嘉道無不諷味以為詩者性情之極則也治之六七年而業日以精道光壬寅癸卯間世父出宰滇南會獨山莫子偲友芝奉其尊猶人先生之柩東葬吾里青田山去黎氏舊廬六里而近三家者互為婚姻又同志友善兄於是方領家政外憇賓客內督諸昆季積苦力行井井有條理日夕發書與子尹子偲相違覆以詩古文辭交摩互厲風氣大開久之羣從子弟服習訓化彬彬皆嚮文學矣年二十四補縣學生員十試於鄉不得志於有司始援永昌軍例報捐教職己酉署石阡府教授又二年補黎平府開泰縣訓導

最後以防苗功選湖北鶴峰州州判至楚檄署藩照磨兼鹽庫大使同治元年調補隨州州判時喪亂之後兄以薄宦羈旅鄂疆位卑而祿微權輕而事減恆不能以通其志悲愉欣戚一寓於詩間與監利王子壽柏心龔子貞昌運陽湖徐子楞華廷中江李眉生鴻齋往來唱讎訕譏笑歌肝膽豁露多不平之鳴蓋才人不得志於時者之所為也少作千數百篇至老刪削且盡僅存四百餘首弟輩強編為侍雪堂詩鈔八卷尚非意所欲留早歲刻者有葑煙亭詞三卷後續一卷餘著多未成家世具世父墓表配阮氏妾陳氏梁氏無子以叔弟兆祺

子汝弼嗣孫二兄與鄭莫兩徵君同時并興名在其次
而知之者少獨今吳縣尚書潘祖蔭稱之曰鄭子尹莫
子偲黎伯庸皆黔之通人也眉生亦亟稱之曰伯庸天
機活潑灑落塵埃吾弗如也余為次敘厓畧俾異世治
黔故者有所攷論焉從弟庶昌表

序

黎君伯庸之官楚北也余司鐸鍾祥耳其名而未識其人每友輩從鄂垣來者必訊黎君皆嘖嘖稱風雅士蓋素以能詩名黔疆中原才士鮮弗知有黎君者心竊慕之亟欲快睹其為人而誦其所作咸豐四年秋流寇逼郢郡合境團練為防禦計鍾祥太守治所也黎君以藩署參軍奉檄來司饋餉捐輸事余始獲與訂交傾蓋談心遂往還無間因遞窺其著述領其緒論乃知黎君當代豪洞悉古今治亂不僅以風雅自居其形諸歌詠者特寄興焉耳故君詩高古簡勁其言多悲憫時艱獨

披胸臆抉去雷同剽襲積弊尤難及者君以廁近大僚
近屬不欲顯為危言激論恣肆譏評雖值山水登臨之
會朋儔贈答之篇隱然抒其憤懣慷慨而終寄託遙深
譬喻微婉令讀者從言外挹之其善養復如此豈區區
以筆藻自銜者比哉余意君負幹濟之才方聲噪縉紳
間當必拔擢見用於世不徒託諸空言視余潦倒閒職
失意罷歸行年六十莫遂所懷者何啻霄壤乃黎君頻
寓書來亦鬱鬱不得行其志將圖高蹈退歸泉石嗟乎
君之遭際竟復同然余既悲已而更惜君奈何天生我
輩例必窮愁抑塞之不遺餘力昔賢謂詩必窮而後工

豈真古今一轍耶殆至是而知天之所以命若人者不
在彼而在此焉君自今騫舉塵壒之表取助煙霞學養
彌邃蘊為金石之音一於詩洩之雖蹇在一時要必聲
施後世立言之效寧多讓於立功之不朽乎今將梓厥
舊稿質諸世遠屬序於余余無當於知言而忝在交厚
不能緘默爰書鄙意若此監利龔昌運



侍雪堂詩鈔卷第一

遵義 黎兆勳 伯庸

述懷五首寄同學諸子

落落窮巷生君我同臭味寥寥懷古心
圖史日經緯閉門形影孱困學精力費
我謀何太拙必欲昌吾氣吾氣豈易昌
此身良可貴慎勿怨斯飢南山歌薈蔚

西南辭賦祖揚馬千古無當其獻賦時
意氣雄萬夫君平隱卜肆講易常晏如
澹泊發古懷垂簾潛著書著書卧里閭
獻賦遊帝都賦持比書所樂孰有餘

山館休息時璚璚談家常謂當求升斗
以為終歲糧所

得亦已細所業日益荒似聞東家翁錙銖泣孤孀淵明

恤人子老杜簡吳郎吾儕請自勗薄道天所戕

吾鄉數老翁峻潔見風概寥寥繼前修隱隱待我輩二

李

白雲先生專北山先生先立

今不作羅唐

鹿遊先生兆姓敬亭先生維安

亦堪慨

誰甘荒微窮千載聲名晦吾欲葺祠宇歲時薦蔬菜一
酌詩人魂臨風掇蘭佩

雞酒席長流笑歌醉巖壑同堂恣歡宴別去各蕭索絡
緯鳴庭隅蠨蛸挂簾幕行者愁飛蓬居者歎病鶴短章
慰離思夜深還獨酌

曉發綏陽至黃魚橋